



Al tayimtsü tsükokba report atema ita 4-5 agitsü: Ram Mohan Naidu

World Archery Youth C'ships: Chikitha-i otsü tasen yanglu



Dimapur Police ajanga Pimla nung nisung tepsetba ken o jangjatsür

Dimapur, Luroi/August 25 (TYO): Dy. Commissioner of Police (Crime)/PRO ajanga Hombarñü sangdong ka nung asür Kesuthlungle Newme ken o dak sendakba tongmelang agi lemsatepba nung, NSCN IM Martyrs Park, Pimla nung Pimla Maikham lenmang nungi feet 240 shi pilar tzütu ka anasa tetsür tasü mang ka nguteta lir ta Chümoukedima PS dangi 7/4/2025 aonung 7:52 ako meta telephone ajanga osang ka arua liasü, ta ashi.

Iba sülen ACP Chümoukedima-i anir CMD PS personnel tem iba tesem tonga ao aser Women PS aser FSL nungia personnel tem iba tesem tonga arua ozü ng agi mela aliba maparen inyaker tasü mang ya post mortem examination atema District Hospital Dimapur-i bener ao, ta Dimapur Police sangdong ajanga ashi.

Iba ken o dak sendakba nung Mhaikam village nungi Teusing Newme (VDB Secretary) ajanga 8/4/2025 nü FIR ka agüja Women PS nung 'regular case' ka zülüoka ADCP rank nung

ketdangsür kati anir Special Investigation Team (SIT) ka tenteta bushisü ngdang tenzük, ta ashi.

Bushisü ngdang den forensic team ajanga lendong atalokba tesem aiben semdangogo aser temulung melem teti aliba tesem ajunga semdanga iba ken o nung kuli tongtipang tem ngutet, ta Dimapur Police ajanga ashi.

Bushisü ngdang mapang tai tonglokja aliri iba mapa tamajung ya inyaker ta kulitem peria bendenteta tai tonglokja alir-i yi agi meseper ain adokdang tepsetba yong 10/4/2025 nü apu.

Iba sülen Court nem interim chargesheet ka file asü, aser out-of-state facility nungi FSL report ataa lir ta Court nem osang agütsü.

FSL report aruba sülen Court nem supplementary chargesheet ka agütsütsü aser Victim Compensation Scheme kübok Peren District Legal Services Authority ajanga asüri yutsür aoba tanur nem nü ngdakba teyari agütsü asoshi mera agiogo, ta kasa sangdong ajanga ashi.

22 buba Nagaland Angh ama Ajay Kumar Bhalla-i tenangzükba agiogo

Kohima, Luroi/August 25 (TYO): Manipur indang Angh, Ajay Kumar Bhalla-i Hombarñü 22 buba Nagaland Angh ama Raj Bhavan, Kohima nung tenangzükba agiogo.

Angh La Ganesan asüba sülen pa nem state Angh inyaktüsü mapa tali nungloktüsü.

Iba Oath of office ya Gauhati High Court indang Chief Justice, Justice Ashutosh Kumar-i ketdangsüa agia liasü.

Iba sentong nung Chief Minister Dr. Neiphiu Rio, Deputy Chief Ministers T.R. Zeliang aser Y. Patton, Cabinet Ministers, MLAs, senior bureaucrats, security ketdangsür aser tongtipang nisungtem dena liasü.

Tenangzükba agiba sülen Angh Bhalla-i Raj Bhavan nung CM Rio-i anir state Cabinet den mezü ngbuba sensaksem aka.

Nagaland Chief Secretary Sentiyanger Imchen, IAS menden sür agiba sentong tembanga Raj Bhavan nung reception sentong ka agia liasü,

kong yimten yimsüsürtem, tribal bodies, arogo nungi teshimtet lenirtem aser CSOs ajanga State indang constitutional head tasenba den salem lemsatepba liasü.

Ajisüaka Nagaland nung kin tulu 17 aliba nungi Ao, Angami, Lotha, Rengma aser Sumi kin tenü ng nung 5 Tribes Committee on Review of Reservation Policy (CoRRP) iba sentong nung shilem magi.

CoRRP yagi küm 40 dak tema sorkar mapa nung backward kin atema menden wazüka yuja aliba reprangshiang ta akhangar.

Parnoki akhangba sorkari agizüka Reservation Review Commission ka tentetaka, iba Commission nung tribal bodies aser CSOs madentsüla, ta CoRRP-i ashir.

Parnoki akhangba ama meinyak tashi sorkar sentong kecha nunga shilem magitsü sangdonga aliba ama kin pongu sangeri tawa Independence Day nunga shilem magi.

Alinen agi Kohima-Wokha NH-2 nokdanga lir

Kohima, Luroi/August 25 (TYO): Hombar nikongdang Kohima aser Wokha tsü ngta National Highway-2 nung alinen tulu alua iba lenmang nung gari mesenzütettsüa nokdanga lir.

Tzü nglu tanen makai aruba ajanga alinen aludang lishi aser long tulu bener alua highway anenbang, ta osang ajanga ashi.

Kohima-Wokha lenmang yagi Tseminyu, Wokha district, Zunheboto kübok Pughoboto

sub-division aser Mokokchung den state yimtiba sendakteper.

Iba alinen ajanga passenger aser commercial gari aika taolen makai ghonda aika soita liasü, saka tia kaa nisung asü-amaba mali, ta police ajanga ashi.

District administration, police aser Public Works Department (PWD) personnel tem iba tesemi ao, saka ali maneni anenzüka aluba ajanga lenmang melapoktetir lir.

Nisung tepsetba ken o mebentetba mechi Dimapur nung longkak ait



Nisung tepsetba ken o mebentetba mechi Dimapur nung longkak aitba mapang tangokba noksa angur.

Dimapur, Luroi/August 25 (TYO): Chümoukedima district kübok Pimla village nung aliba ayong ka anasa arishi küm 31 tain Naga tsür ka tepsetba tasü mang April 7, 2025 nü ngutetba dak sendakba nung ochi obendang khanga Dimapur nung yimjung nung longkak aitba nung nisung meyirijang aikati shilem agia liasü.

Naga Shopping Arcade (Super market) nung iba sentong ya Zeliangrong Youth Organisation Nagaland, Zeliangrong Students Union Nagaland, Zeliangrong Mipui Organisation, Western Naga Youth Front ajanga ayongzüka liasü, kong Dimapur nung aliba civil society temi nungita liasü.

Peren district kübok Mhaikam yimtsü ng nungi Chubatamsu Jamir kinungtsü Kesuthlungle Newme ya anogoshi aayanga senzür ka liasü aser la aonsotsü abeni aoba Pimla village nung ayong ka anasa tepsetba aliba April 7 nü ngutet.

Iba sentong nung Zeliangrong

Youth Organisation Nagaland tir R John Zeliang-i ashiba agi, asür kinunger nem sorkar ochi obendang magütsü aser onok ajem-ajema malitsü.

Pai Naga nunger dang lungjema alitsü aser tetsübo makai ochi jembitsü ayongzüka liasü.

Iba rally nung lokti tentet balala nungi jembirtemi asür asoshi ochi obendang akhang aser ibai Zeliangrong asoshi masü saka Naga nunger ajunga asoshi nokdaker ta ashi.

Iba sülen Commissioner of Police, Dimapur nem tatembang takhangba ka agütsüba nung iba mapa tamajung inyaker/tai tonglokja alirtem tenü ng anogo 15 tsü ngta sangdongtsü shia lir.

Iba shiti ngur anogo 15 tsü ngta Forensic Laboratory (FSL) report ya agütsütsüla, ta parnoki akhang.

Zeliangrong organizations temisa Nagaland nunga FSL ka amenoktsü akhang aser item takhangba meinyakra metokmeperi tebilemtsü ya

temaba ketdangsür dangi abentsü ta ashi.

ZYON, ZMON aser ZSUN ajanga meyongnem agüja aliba memorandum nungya, taoba mapang tezüluba nung takhangba agüjaka tanü tashi aibelener/tai tonglokja alir tenü ng mesangdong, FSL report kera magütsü, koba kuli tejangja magütsüi 'pending' nung lir ta ashir, ta shia lir.

FSL report tang tashi magütsütetba aser tenü ngtem temai madoktsüba bushisü ngdangba nung tamakok tulu aser ochi obendang tamendakba nung mapet, ta parnoki ashi.

"Menü ngdakba nung bushisü ngdang metembangba ajanga asür kinunger temulung nung anisü ngzük magütsür, nüburtemi ochi bushisü ngdangba maparen nung tamang makateti akumer aser mapang talangka mapa shidak meinyaki aliba ajanga bushisü ngdang nung temulung melem teti akumer, ta ashi.

Peren district mokdanga aliba anogo 15 atema lapoker

Dimapur, Luroi/August 25 (TYO): Asen adianutsür asür Kisuthlungle atema tawa rally ayongzükba nung tashi tait aser yimjung nung tangatetba kasa aliba sayutetba ajanga iba sentong ayonger temi mapang telatet makai mokdanga aliba ya August 25, 2025 aonung 8:00 ako nungi anogo 15 atema soita atar, ta ZYON, ZMON aser ZSUN ajanga Peren district nung aliba nüburtem dang sangdong ka ajanga ashi.

Nenoki yimya tajung aser

telungjem sayuba ajanga iba telem tetba ya agi, kong asenoki ochi obendang asoshi tashiyim amshia akhang. Nenoki timtem ajuruba onoki angateter aser nenoki yamaji bendanga agütsüba asoshi pelaba lemsateper, ta sangdong ajanga ashi.

Asen movement ya tongtipang phase tasen kati ayaoka aier. Sorkar ketdangsür nem anogo 15 tsü ngta telangzüba agütsütsü tatembang takhangba ka agütsüogo. Aser

Pimla nung nisung tepsetba ken o kanga junga bushisü ngdanga ochi obendang tekeraba nung agütsütsü asenoki akhangba ama parnoki iba mapang tasü ita inyaktüsüla. Mapang sükzütsüba nung aseni akhangba ama meinyakra, asenoki phase tasembuba aser tesashiba longkak ait tenzü ktsü ta asenoki jangja-jangja metetdaktüsügo.

Aser tarutsü nung tensa tamajungba makumtsü asoshi sorkar nungi telangzüba tajung angutsü imlar, ta ashi.

ANTAM-i Mokokchung town tongtibang tesem 7 nung CCTV 14 inoktsür

Mokokchung, 25th Aug (TYO): Mokokchung nüburtem asoshi osang tajung kaji - All Nagaland Taxi Association Mokokchung (ANTAM)-i Mokokchung jila tongtibang tesem tenet (7) nung Closed-Circuit Television (CCTV) 14 tenlaba den itemji amenoktsütsü maparen tenzü kogo.

Iba mapa tenzü kba sentong August 25 nü parnok ANTAM office nung agidang, Mokokchung Traffic Police OC, Athong Lkr-i anir traffic police-tem, ANTAM ketdangsürtem

aser osangbenertem densema liasü.

ANTAM tir, Tongpang Pongen-i iba sentong nung jembidang, Mokokchung town nung tang nüburtemi nü ngdakba kechi lir ta asadanger aser traffic police-tem den tongteprateper CCTV ya inok nung nüburtem lenmang kar nungbo tajangzük ngudisü ta apiteta ANTAM sanen luden nung jembiteper iba mapatong inyaktüsü lemteta liasü, ta metetdaktüsü.

Mokokchung nung gari lendong balala ajuruba ya

reprangdangra aiaterm nung teimba ataloker, aser lendong ajuruba den gari tsüker ajenba aser nübur meyong osettsüset raksatsüba aika ataloker saka aiaterm ataloker asünung, aiben security camera junga maliba ajanga tsüngsü menguteter mesüra mapang shitak nung aibelenerntemji mebushiteter, anungji, iba CCTV amenokba ajanga traffic police asoshi teyari ka asütsü aser nüburtema iba ajanga tali kümdangshitsü imlar, ta pai ashi.

(Maneni tapak 2 nung...)

Performance Incentive Grants nem CIPS award agütsüogo



Jammu and Kashmir Lt. Governor ket nungi NECTAR team-i naroküm agizükba noksa nung angur.

Dimapur, Luroi/August 25 (TYO): Public Systems nung Innovations atema Centre-i 2025 küm April ita sangdongba ama Department of School Education kübok NECTAR project indang sentong Performance Incentive Grants (PIG) nem education sector nung 'CIPS Innovation Award - 2024' agütsüogo.

India ajunga nungi CIPS-i application 226 agizük aser item rongnungi 83 shim aser project 34 atema spot study tem agi, iba sülen tatem nung project 21 nem sector balala nung naroküm agütsüogo.

Iba naroküm ya Avelu Ruho (NCS), School Education Joint Secretary aser NECTAR indang Deputy Project Director Avelu Ruho (NCS)-i anir lar team-i 'CIPS Awards Ceremony - 2024' nung agizüka liasü. Iba sentong ya Directorate of Information, Srinagar nung August 22 nü agiogo.

naroküm agütsüba sentong

nung tongti tejaoker Jammu and Kashmir Lieutenant Governor Manoj Sinha-i, nüburtem olaji sorkar sentong balala temulung asütsüla aser policy yangluba ya parnok nem shilem agidaksütsü aser parnok tenüngdakba peritsütsü atema yanglutsüla, ta ashi. Paisa, file kaji paper tapak ka dang masü saka lisopurtem taküm aser tarutsü atema kanga tongtibang lir, anungji inyakyim ka jenjangi iba ajanga taküm melenshidaksüba agi odangtetsü, ta ashi.

Sentong nung tetushi tejaoker Jammu and Kashmir Chief Secretary, Atal Dulloo (IAS)-i o jembiba mapang, purapiteta inyaksü atema tasü aittsü nüngdaker aser item yagi taküm libaliro tezübaba kümdaksütsüla, ta ashi. Paisa, legislative inyakyim ajanga küm aika takok mongutetba bureaucratic innovations agi küm shika tsünga koktetsü, ta ashi.

Centre for Innovations in

Public Systems (CIPS), award agütsüba lokti tentet ya India sorkari amenokba Administrative Staff College of India indang autonomous centre ka lir.

National lokti tentet ka ama CIPS mapaji public system nung innovation tem takaraba benoktsü aser tali prokshia yoktsü atema lir. Iba ya ajangzüksü atema CIPS-i innovative inyakyim tajungtibatem tushir.

Nagaland nung school 1,914-i Performance Incentive Grants agiogo, koba sen crore 86.13 liasü. Iba ajanga state ajunga nung Management Committees (SMCs) aser School Management and Development Committees (SMDCs) inyakyim tajungba kümdaksüogo.

Department of School Education-i, District Administration, SMC, SMDC aser lokti lenirtem dang parnoki teka amteper yakyaka inyakba aser shisatsü agütsüba atema kanga pelaba lemsatpogo.

NPF-i Ungma nung tezüngzüktepba pelashishia agizükogo

Dimapur, Luroi/August 25 (TYO): Naga People's Front (NPF)-i tawa Mokokchung kübok Ungma yimtsüng nung Naga nung Political Group tem, kin balala hoho tem aser Forum for Naga Reconciliation nung longjemer "Ungma Statement" sangdongba pelashishia agizükogo.

Lokti balala sabang ka nung longjemba ajanga, lenirtem aser nüburtemi sensaksem aser tangatetba shimra telongjem aser tesendaktep yanglushitsü takoktsü ta jangja jangja sayur. NPF-isa, Forum for Naga Reconciliation-i anibelem mesasai inyakba, NGP lenirtem shisatsü, kin balala hoho temi len sayuba aser Ao Senden aser

Ungma nungertemi iba senden takok ngua ayongzükka agiba atema kanga pelaba lemsatp.

NPF-isa, Ungma nung sayuba tanüla ya Naga nung asoshi timla ka aser iba yagi teti atema ken o bentettsü asoshi inyakyimtem tashi itshidaksütsü ta amanger. Onoki Naga nung ajak dang iba telongjem tanüla ya sarasadem aser teka amteper inyakba ajanga nongita yaritsü mepeshir, ta NPF-isa shisem.

Naga nung telongjem, yimjung aser yimden yimsüsüba tsütsü tejangrabatem asoshi inyakba ya NPF-ia pusemer, ta kasa sangdong ajanga metetdaksü.

AKTKSCJ indang takdang tasenba semzükogo



Dr. Temjenwapang-i AKTKSCJ-i indang takdang tasenba bendanga agütsüba noksa nung angur.

Kohima, Luroi/August 25 (TYO): Ao Kaketshir Telongjem, Kohima Science College, Jotsoma indang takdang tasen ka August 20 nü semzükogo.

2024 küm November 23 nü Hon Jubilee (1974-2024) amungba mapang bangzüng agizüka ayuba dak ajemdaker iba takdang ya yanglua liasü.

Iba takdang ya Kohima Science College (Autonomous), Jotsoma Principal, Dr. Temjenwapang-i semzükja liasü.

AKT, Ao Faculty züngsemtem, Ao Alumni, KSCJ in-law tem aser temulungertemi tenla tajung agütsüba ajanga iba mapa ya takok ngua inyaktetogo.

Takdang ya 2025 küm May ita 6 nü nungi yanglu tenzük aser August 16 nü tembanga liasü. Sentong nung Construction Committee Convenor aser Associate Professor, Department of Chemistry, KSCJ N. Meren Ao-i, iba mapa takok ngua inyaktettsü asoshi tenla tajung agütsür aser teka amteper inyaker ajak dang kanga pelaba lemsatapa liasü.

Iba takdang tasenba ya telongjem, bendanga agütsüba aser college terenlok asoshi ajak longjemer inyakba temaitsü lir.

Sentong ya KSCJ nung English Department tekolakba Dr. Seyiekhrielle Whiso-i temaotsü meshizüka sarasadem tembanga liasü.

ANTAM-i Mokokchung town ...

(TAPAK 1 NUNGI...)



ANTAM-i Mokokchung town tesem 7 nung CCTV 14 inoktsütsüba maparen tenzükba sentong ka parnok office nung agidang tangokba noksa nung angur. Mokokchung 25th August, 2025

Mokokchung town tiyong nung CCTV kar inoka lir saka iba itemji mapa junga meinyaker, aser dokan aika nung CCTV inoka lir saka itemji pei juri dokan sasap nung auakortem meittsü atema inokba dang, saka public atemabo CCTV inoka mali. Anungji, traffic police den shisa agiteper tongtibang tesem 7 shima (Itemji - IOC Mariani junction nung ka, popular bakery anasa ka, taoba Eastern Hall aliba anasa ka, Elate hostel anasa ka, city square nung ka, FAC bus stand anasa ka, Aier Bakery anasa ka) nung inoktsü aser item tesem ajak nungji camera anana (total 14 CCTV) amenoktsü tanü nungi maparen

tenzüksü, ta tirisa metetdaksü.

ANTAM omen "service to the public" nung ajemdaker iba tenure yagi 2022-23 Nagaland nung district balala semyonga temba yimtepa jajaogo, 2024 nunga Mokokchung merükmejuba

"Clean Mokokchung" maparen nunga akokba nung shilem agiogo aser taküm 2025 nung Mokokchung nüburtem asoshi iba mapatong ya jungdisü ta bilema inyaker, ta paisa ashi. Iba maparen dak sentakba nung Mokokchung Traffic Police-i amalitepa yaritepba asoshi paisa pelaba lemsatp.

Sentong nung Mokokchung Traffic Police OC, Athang Lkr-i mapang tatsüka agidang,

ANTAM-i nübur nüngdakba ajiteta iba ama mapa tajung inyakba asoshi pelaba den ibai ajak asoshi tatishitsü ka lir, ta metetdaksü.

ANTAM-i maparen ajak nung Traffic Police den amalitepa aruba asoshia pelaba den tarutsü nunga kasa tangatetba nung külemi senteper nübur asoshi inyaksü imla-a atar, ta paisa shisem.

Iba ya tenüng agi sayutsü atema masü saka tebilemba tajung yur inyakba mapatong ka lir aser ANTAM-i akokba tashi oset tajungtiba agütsür, anungji, ibai kanga junga anepalua amshidaksünür, ta ANTAM Advisor, Imli-i mepishia metetdaksü. Paisa CCTV osettem meshiteta sarasadem.

NSEDM-i Mokokchung nung angati training agütsütsü

Dimapur, Luroi/August 25 (TYO): Investment & Development Authority Of Nagaland (IDAN) kübok Nagaland Skill & Entrepreneurship Development Mission (NSEDM)-i, Mokokchung district nung ita ka atema angati training agütsütsü sentong lir.

Mokokchung district nung aliba lanurtem/kaketshirtem mapa nung anioktetsüsa skill tem angazükdaksütsü aser skill training aser mapa inyaksü atema maongka agüja entrepreneurship ajungkettsü nükdong nung iba training sentong ayonger.

Training agütsütsü aliba trade tem:

- (i) Masonary & Tiling
- (ii) Electrification & Plumbing.

Training nung shilem agitsü atema application form tem Swavalamban Connect Kendra (SCK), Mokokchung Centre mesüra Mokokchung District Additional Deputy Commissioner, Sub-Divisional Officer (Civil) aser Extra Assistant Commissioner office nung angutsü.

Training nung shilem agitsü janrartermi Application form kanga junga fill up sür temalen shisema aliba Office/Centre mashi ka nung benoktetsü. Training agitsüba anogo mapangtong nung metetdaksütsü, ta kasa sangdong ajanga metetdaksü.



August 25, 2025 nü New Delhi nung aluyimer lenirtem- P. Krishna Prasad, Rajan Kshirsagar, Rakesh Tikait, Hannan Mollah aser Prem Singh Gehlawat-i 'Kisan Mahapanchayat' nung jembidang tangokba noksa nung angur.

India aser Fiji nati defence dak sendakba tezüngzüktep kar agi

New Delhi, Luroi/August 25 (Agencies): India aser Fiji nati defence tsütsü amalitepa inyakba jenjang tajungba akümtsü aser Indo-Pacific region nung tesünep alitsü atema longjemer inyaktsü bangjemogo.

Hombarnü Ato kilonser Narendra Modi aser Fiji Ato kilonser, Sitiveni Ligamamada Rabuka nati tzüym nung security atema amalitepa inyaktsü bangjem aser India-i training agütsüba den osettsüset agüja Fiji yaritsü metetdaksüogo.

Modi aser Rabuka na senden amenba sülen linük anati mozü, skill development aser shishilembaba dak sendakba densema lenla balala nung tezüngzüktep tenet agiogo.

Osangbenertem den jembidang Ato kilonser Modi-i, India aser Fiji na ya tzüym nung meta talangka pilaa lir, ajisüaka

asenok ajak taginüba rong ka nung dang lir, ta ashi.

"Küm 33 sülen 2014 küm India Ato kilonser kati Fiji li nung tetsüng ajemoka liasü. Ni iba maongka agiba atema pelar aser nüma atanger," ta Modi-i ashi.

Fiji semdangba bilemteta pai, "Onoki India-Pacific Islands Cooperation atema Forum, FIPIC tenzüka liasü. Iba mapatong ajanga India-Fiji tesendaktep nung tashi tasen agütsüba dang masü saka Pacific region ajak nung tesendaktep junga aküm. Tanübo Ato kilonser Rambuka-i semdangba ajanga linük ana tesendaktep nung otsü tasen ka tenzüker," ta ashi.

Rabuka-i anogo asemnü India semdanga Amongnü New Delhi tonga aru. Fiji nung Ato kilonser akümba sülen pai bendang linük mezüng semdangbaji India lir.

India-i Pacific region nung

linük aika den security atema partnership yangluba mapang ka nung Fiji leniri India semdangar.

Ato kilonser Modi aser Rabuka natasa kiralongrartemi Pahalgam amakba sashia aitsü aser kiralongra anema raratsü bangjem.

Modi-i, "Künati defence aser security sector nung taliba amalitepa inyaktsü atema melungtepogo. Iba atemaji asalentong renemogo," ta metetdaksü.

Fiji nunger tzüym nung security atema India-i training aser osettsüset agütsütsü.

Modi-i, Fiji atema climate change ya tebilemtsü onük tuluka lir, ajioda tzü-mopung lendong mapang nung India-i Fiji yaritsü, ta metetdaksü.

Ato kilonser Modi-isa, India-i Fiji nem agricultural drones 12 aser mobile soil testing laboratory ana agütsütsü, ta metetdaksü.

Al tayimtsü tsükokba report atema ita 4-5 agitsü: Ram Mohan Naidu

New Delhi, August 25 (Agencies): Hombarnü Union Civil Aviation Minister, Ram Mohan Naidu-i, Ahmedabad nung Air India tayimtsü tsükokba maneni bushisüngdangdar, aser iba report renemtsü atema ano ita pezü-pongu agitsü, ta metetdaksü.

Taküm June 12 nü Air India tayimtsü tsükokba lendong nung tayimtsü nung mena alirtem aser ali nung alirtem ajak senteper 260 dak tali asü.

Union minister-i, iba tatalokba bushisüngdangba maparen nung voice recorders,

flight data recorders aser tayimtsü raksaba ama lenla aika jungjunga bushisüngdangtsüsa akümer, anungji bushisüngdangba maparen tembangtsü atema ano ita pongu mesüra iba dang nungi mapang tali agitsü, ta metetdaksü.

"AAIB-i bushisüngdangba mezüngbuba shilembo renemogo. Final report atema ano ita pezü-pongu shi agitsü," ta Naidu-i metetdaksü.

"AAIB leniba nung bushisüngdangar. Parnoki kanga junga inyakogo, ajisüaka asenoki final report ji mangu

tashibo kechi atalokar tejangja memetettsü," ta pai ashi.

Aircraft Accident Investigation Bureau (AAIB) indang mezüngbuba report nungji Ahmedabad nungi tayimtsü apusoba sülen second 3 tsüngda engine anaprongla nung totzü supply maliba aser fuel control switches nung "RUN" nungi "CUTOFF" maneni melenshiba shia lir.

Voice recorder ajangasa pilot ana tsüngda kati ka dang, "Kechiba nai totzü shibang?" ta asüngdangba aser tanabuba pilot jagi, "Ni yamaji meinyak" ta langzüba jangjaogo.



August 25, 2025 nü Kolkata nung Blind Persons' Association nungi nükpokertemi matamabensartem nem reservation, shisaliok aser temeden balala agüjang ta longkak aita jajadang tangokba noksa nung angur.

Punjab nung nüburtem temeden agientsü ni memelatsü: CM Mann

Chandigarh, Luroi/August 25 (Agencies): Hombarnü Punjab Chief Minister, Bhagwant Mann-i, Centre nung BJP-i aniba sorkari state nung nisung lakh 55 nem angati ration magütsütsü atema sentong yanglua inyaker, ta aitsü.

Paisa, "Nüburtem temeden agientsü atema ni memelatsü," ta ashi.

Centre sorkari Punjab nung nisung lakh 55 indang angati ration anentsütsü atema tetuyuba agütsüogo, ta Mann-i metetdaksü.

Anogo ishika tejaklen-a Mann-i, Centre sorkari National Food Security Act kübok nüburtem nem teyari agütsüba anentsür, ta aija liasü.

Ajisüaka Union Food & Consumer Affairs Minister Pralhad Joshi-ibo, Mann-i jembiba oji tiyazü; Punjab sorkari tiyazü osang proktsü meranger, ta aitsü.

Hombarnü Mann-i, Centre nung BJP sorkari state nung nisung lakh 55 indang angati ration anentsütsü atema telemtetba agiogo, ta metetdaksü.

"Nü tenüng-a iba list nungji lir. Tang tashi nung Punjab nung nisung crore 1.53-i ration ngua liasü, saka BJP sorkari iba teyari ya nisung lakh 55 atema anentsütsü telemtetba agiogo," ta paisa metetdaksü.

"State nung kanga sensaker kibong asem shia nungi kibong ka nembo ration magütsür. Iba ya sorkar telemtetba ka dang masü saka Punjab nung sensakertem, aluyimertem aser aayanger kibongtem anema inyakba lir," ta Mann-i ashi.

Taküm July ita nungi tenzüka

sorkari Punjab nung nisung lakh 23 indang ration anentsüogo, aser ibaji e-KYC merenemba agi lir, ta Centre sorkari ashir, ta pai metetdaksü.

"BJP-i ano September ita nungi Punjab nung nisung lakh 32 bo sensakertem masü ta shia parnok indang ration anentsütsü. BJP-i state nung ajak senteper sensaker lakh 55 indang ration anentsütsü sentong yanglur," ta pai metetdaksü.

"Ya shisadangar; Punjab nung aliba nüburtemi chiyungtsü züsenteter aser linük nübur ajak mesür. Tanübo Centre sorkari Punjab nunger auso nungi amtsük rakzüksü atema inyaker. Iba ya tim asü?" ta pai asüngdang.

"BJP-i, item nisung karbo gari lir, kari income tax agütsür, karbo ali acre 2.50 dak tali lir aser kibong karbo sorkar mapa inyaker, anungji item nisungtemji sensaker masü, ta ashir. Kibong nung nisung ka mapa inyakra aser gari ka lira kibong rangbenji takar asü. Kibong züngsem ajak (ration) cards anentsütsüji tim asü?" ta Mann-i asüngdang.

"Ration card ka danga manentsütsü. Onoki beneficiary crore 1.29 reprangshiogo aser tanüngba mapaji taruba ita trok tsüngda renemtsü," ta pai metetdaksü.

"Ni Centre sorkar dang mapang meshisemogo. Onoki kibong shia dangi oa kibong jenjang asadangtsü. Iba ya ration atema raraba dang masü saka Punjabi nunger temeden aser akhümket atema rara ka lir," ta Chief Minister-isa metetdaksü.



August 25, 2025 nü Lucknow nung Uttar Pradesh Chief Minister Yogi Adityanath-i Group Captain Shubhanshu Shukla aser Shubhanshu kinüngtsü Kamna na ajurudang tangokba noksa nung angur.

J&K kübok LoC nung Pakistan nungi yokba drones aika angu

New Delhi, August 25 (Agencies): Jammu & Kashmir kübok line of Control (LoC) nung Pakistan nungi Hombarnü security sepaitemi operation ka tenzüker, ta ketdangsertemi metetdaksü.

Pakistan nungi yokba drones ji Amongnü aonung 9:15 meta Mendhar sector kübok Balakote, Langote aser Gursai nallah nung angu.

Item drones ji itdangittsü atema Pakistan nungeri yokba

asütsü, ta melung melemi bilemer. Drones ji anünglen kanga talang nung liasü, aser minute 5 tsüngda tanaben Pakistan nunger tsütsüleni meyipa ao, ta ketdangsertemi metetdaksü.

Sepaitemi iba tesemji longbang aser Hombarne anüngtsüng sangwali tesem aika mita reprangogo, ajisüaka drones nungi raraba hadir mesüra temesepba mozü tsükdaktsübabo kecha mangu, ta ketdangsertemi metetdaksü.



TIR YIMYIM YIMOBILEM (EDITORIAL)

DIMAPUR TUESDAY, AUGUST (LUROI) 26, 2025

Social Media tekümdangtsü

- P Tiamongba Aier

Putu 21 buba ya alima kanga dang kara painba mapang ka lir aser ibaji talisa technology nung lir. Tanü asenok smart technology agi meketbanger alir aser item rongnung asenoki smart phone kanga sapua amshir. Tanü nisung ajak ket nung amai smart phone lir aser iba ajanga asenok tsüngda tongtpratepba dang masü saka teyari balala angur. Ano smart phone aliba ajanga asenoki social media tapu balala amshir aser asen tebilemba lemsatepba den osangtsüsang pet ta belenshiteper, saka social media kümdanga mamshira "apology letter" zülutsüsa tensa-mapangtem ajurur. Tawa asen yimtiba Kohima nung Dr. T. Ao Trophy (Inter-District Football Championship 2025) mapang aser final asaya sülen nisung kari social media nung o mekümdangi züluba ajanga kin o kin tsüngda ken o tulu adoka jembitsü tenzük saka Sumi Youth Organization (SYO)-i tebang aiba ajanga ken o tuluba küma moudaktsüi tatem nung ken o adokdaktsür nem osangkaket nung tatok meshidaktsüba asenoki nguogo. Nagaland nung kin o kin mesüra yim o yim mesüra kidong o kidong tsüngda mangatettep adokbaji tanü tasen masü aser asenoki iba ya social media putu masüdang nungi ajangshia arur, saka social media amshi tenzük "apology letter" zülutepba ya kanga bulua züngshia arur. Naga nunger longjemtsü indangbo jembibet jembir saka Naga nunger mulungsentsü taroktiba nung ozü, nür, par ta asüba tangatetba tuluba yua lirji aiben onük tila ka tuagi ken o tulu kümdakja aodang aiben Naga nunger longjemtsüba masü saka pilatsüsa ang tensa-mapangtem ajurua arur. Tang tesüsaba social media nung Dr. T Ao Trophy nung finalist ana- Mon aser Niuland tsüngda asaya ajanga kin o kin onük kümdaktsür toktepdang Naga nunger tsüngda telemsa adok. Telok kati Konyak nunger aser telok kati Sümi nunger pusemtepba toktepa asenokinguogo. Tiyongtsüi ia kin ana tsüngda tangatettep kati arutsü mesüra aremzükteptsü indang jembirbo aika maliasü aser iba ya asenok Naga nunger atema tebilemtsü tulu ka lir. Hao asenok India linük kübok alir asünung Indian Constitution nung Article 19(1)(a) ajanga Freedom of Speech and Expression agüja lir, saka ano Article 19(2) nung Freedom of Speech and Expression atema Reasonable Restrictions lateta lir. Maneni, Information Technology Act, 2000 (IT Act) nunga asenok tebilemba aser teshinüba ajakbo yimjak nung meshitettsüsa talenba aika lateta lir. Anungji yimjak nung mesüra social media nung kü mulung /ni shinübabo ashitsü ta mesüi jungjunga bilemdanger ang mesüra shisadanger ang jembitsüla/zülutsüla, kechiyong tia mekara "apology letter" zülutsüsa mesüra police tsüngdang ken o küma okadaki aotsüsa tensa ajurutsü ana nung lir. Anungji, tanü asenok smart technology amshiba putu nung alirji aser asenok ket nung smart phone bena lirji asenok-a smart süa alitsü merangtepd aser talisa kibok nung jembitsüba o tembo social media nung meprokshili.

OLEMSABANG

TENÜNGSANG AGÜTSUBA AGI TELONGJEM TALI AKANGSHIR

~ L. Kika Pongener.

Tanü asen Aor lokti-tentet ajak nung kanga dang tobur tajung mapa kaji, takok tajung angudang tenüngsang agütsütepba ya asütsü. Atangji, tanu asenok adenba loktiliba ajunga nung iba ama tenüngsang agütsütepba taluposa aliba ajanga telongjem, temeimtep aser tesentaktep tali akangshir. Koba telok nung kati ka nem tenüngsang agütsüba taluposa lidir, idakji telongjem, temeimtep aser tesentaktep tali alitsü aser teronem tanang atoktsü. Kibong nunga kodang tsürabur o chirnur na tsüngda nung kati ka nem tenüngsang agütsütepba taluposa lidir, iba kibong nungji tesunep aser temeimtep tali alitsü. Kibong ka nung tsürabur o chirnur na tsüngda nung tesentaktep tajung aliba küli tulutiba kaji tenüngsang taluposa agütsütepba ya asütsü. Kodang jala-jabasotemi takok tajung aser tenüng tajung, konang-naroküm tajung kar bentsür arudir, misura kanga nungdaka aser rongdaka aliba mapa tajung kar inyakdir, idangji asenok tsüraburtemi "Junger niiii" ta tenüngsang agütsütsüla. Ano kodang tsüraburi kibong atema aser chirnur atema mapa tajung kar inyakdir, idangji jala-jabasotemi oja-oba 'Kanga Junger' ta tenüngsang agütsüra, ibajagi tsüraburtem-ia ano tarutsü nung tajungtiba inyaktsü merangtsü, aser idangji memeteti kibong nungji tsürabur o chirnur tsüngda nung temeimtep tali akangshitsü aser kibong nungji teronem tanang atoktsü.

Atangji, mapa tajung inyakba atema kati ka nem tenüngsang agütsütsüba yabo atsüayunga meli-i sadok-sadoka agütsütsüla. Tenüngsang agütsüba ya temulungjang taroktiba nungi adoker, aser nisung shirnok shisatsü tangatetba temesu masü, saka tesadem aser tindang shisatsü dena lir, shirnok dak nukmerem aser mekokachi shisatsü mali, parnok jagi teti tangari tajung inyakba nung tenüngsang agütsütsü atsü-ayunga malitsü. Otsüla - oboula nungeri shin 'o' jembia aruba ka bilemteter.... "Tsükpo anong ajen nung Posu tokolak menu"....Akhi tsürabur mapang nungi asen sobaliba nung tsük (Paddy) ayudak Jen yanglur, tsük tokdena ayudak 'Anong' (Basket) tulu yong agi taka yanglur, iba nungji tsük sunga tokdena ayur. Ken mapang ka nung, Jen ka nung anong tsük tokdena yua akadak "Tsükpo" (Ozü) ka kanga pelaseta ajendena/jokdena asaba ola angashir 'Posu' (Ozü) tokolak menu. Tetezü....kanga mepelai bilem. Aji oda, Tsükpo-la pelaba denji Posu-la jia orr, tena külemi pelatep asübo koda jungla....Ajisuaka, Tsükpo-la pelabaji angashir Posu-laji kanga jashi....Tetezü tenukmerema bilem. Iba küsaji asen mimchir rongnunga, tembar, adianu, kidanger, kiyonger, külem lisemer, külem tenzük kari mapa tajung kar inyaktet nung, misura temaba jenjang nung takok tajung ang, misura yimer-yimsanger nem konang-naroküm tajung bentsür aru, idangji 'Kanga Junger-niii' ta tenüngsang agütsütsü melena, tenukmerema aser mokokachi agi tilu-panglua atala-a, sensa-masara....Ibala jagi adianu tsüngda, temba-tinur tsüngda, külem lisemer tsüngda telongjem aser tesentaktep tajung raksatsütsü aser asenok adenba lokti nung telongjem, temeimtep aser tesentaktep tajung aliba raksatsütsü.

Asen mimchir ajak jaklaliru balala lir, tesasatsüka, karbo tenukmerem aser mokokachi jakla keta lir. Aji oda, nisung karibo mapa tajung nung tenüngsang agütsütsü melena tenukmerem aser mokokachi agi, tashimait mokokmein-ang kar ajiteta, tilu-panglua, atala-a jungnatsütsü merangba-a karbo lir. Aji oda, item ajakji tanga kecha agi masü, saka tenukmerem aser mokokachi jakla nungi adoker, aser iba ama jaklaliru adenba nisungji kangasa tia maka asütsü. Khen mapang ka nung Nashi anuker (Cow-herd) ka, arem moapu nung Nashi nuka alidang, kenu pai shiruru ola kar angashir tetsübu agi....'Hoooi' ta tashii ola tulu agi ayimoktsü...Idangji aongmetang ola agi pa dangia Hoooi...ta ola tulu agi meyipa langzük. Aji angashir, Nashi anuker-sangji kanga jashi....Anungji ano tanaben pai "Na nisung tamajung" ta ayimoktsü, aser idangji aongmetang jagia "Na nisung tamajung" ta meyipa langzük. Anungji Nashi anuker-sangji kanga jashia kidangi shilang, aser iba tatalokba otsüji ki tonger tetsü dang atonga ashi. Idangji tetsü-i pa dang asüngbo, na arem moapu tongli-i dang Hoooi..."Na nisung tajung".... ta ayimokjang ta ashi.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Korean Arogoi mission wadang longjemer inyaktsü bangjem



South Korea yimtiba, Seoul nung Korean Mission wadang sangdongba sülen denomination balala nungi lenirtem, mission department nung lenirtem aser Korea World Missions Association (KWMA) nung lenirtem tangokba noksa nung angur.

August 25, 2025: Taoba hopta Korea nung Protestant denomination nungi lenirtem aser Korea World Missions Association (KWMA)-i senteper alima nung mission mapa longjemer inyaktsü asoshi bangjema külem sangdong ka agütsü.

Talisa mission wadang nung lanurtem nem shilem agidaktsütsü aser bendanglen Korean cults nokdangtsü atema longjemer inyaktsü parnoki bangjem.

South Korea yimtiba, Seoul nung aliba Korean Christian Building nung ayongzükbang conference nung Presbyterian Church of Korea nung telolakpurtem (Hapdong aser Tonghap), Korea Evangelical Holiness Church aser Presbyterian Church of Korea (Hapshin)-i Korean mission nung temelenshi atema külem sangdong ka agütsü.

Korea Evangelical Holiness Church nung Tir, Rev. Ahn Sung-woo-i, tang alima nung mission wadang nung tayongzükbang jenti ajurur, aser item rongnung Korean cults, lanur missionary tem ishika dang aliba aser Korean mission wadang nung temelenshi nüngdakba lir, ta ashi.

Rev. Ahn-i, "Iba ya tenüng agi dang benoker masü saka telemtetba agia inyaktsüla. Ibaji ajanga Korea nung Arogotem longjemtsü, tayongzükbang koktettsü aser osangtajung prokba milak tanaben jangrutsü," ta ashi.

PCK (Hapdong) Tir, Rev. Kim Jong-hyuk-i, alima nung Khristan yimsü züinba tesem melenshidar; tangbo Africa, Asia aser Latin America-i mission wadang tuluba inyaker, ta ashi.

Rev. Kim Jong-i, "Joko asenok ya missionary yokertem dang masü. Joko tangartem den longjemer külemi mission wadang inyaktsü nüngdak," ta ashi.

Paisa missionary tem dang Arogo lenitsü atema local

Arogotem nem mapa nunglorkjang, nütsüngsüba nung ranglokang aser bendanglen aliba Arogotem nung rangloksüla, ta ashi.

PCK (Tonghap) nung Tir, Rev. Kim Young-gul-i, alima nung Korean cults prokba ya tebilemtsü onük tuluka lir, ta ashi.

Paisa, tangbo Korean missionary tem dang nungibo Shincheonji, World Mission Society Church of God aser Guwonpa (Salvation Sect) ama teloktem teyakyakba lir, aser ibaji ajanga mission inyakba Arogotem ilatsür, ta ashi.

"Khrista osangtajung prokba mission ya mezüing missionary tem azü aser asentzü agi tenzüka liasü, ajisüaka tang item cults ajanga telemsa adokdaktsür. Item cults ajanga local Arogotem, lenirtem aser tamangertem raksatsür," ta pai ashi.

Paisa item tebilemtsü balala bentettsü atema missionary ajak nem training agütsütsüla,

amalitepa inyaktsü atema networks alitsüla aser item cults anema seminary alitsüla, ta ashi.

PCK (Hapshin) Tir, Rev. Park Byung-sun-i, "Lanurtem dak rangloksü atema kanga nüngdaka kümogo, kechiyong lanurtem maliba Arogo ka aser lanurtem maliba mission kaji tarutsü atema teimla mali," ta ashi.

Paisa Arogotem dang lanurtem ola angatsüla aser lanurtem nem mission nung shilem agidaktsütsü atema maongka lapoktsütsüla, ta ashi.

Korea World Missions Association (KWMA)-i ayongzüka taküm March ita aser July ita na nung denomination balala nungi lenirtem senden ayongzüka amenba sülen parnoki külem sangdong ya renem aser tan ita sangdonger.

Korea nung denomination balalai longjemer mission wadang inyaktsü nükjidong nung item sentong ayongzüik, ta tayongertemi metetdaktsü.

Evangelical Alliance-i Serbia linük atema sarasademtsü ayonger

August 25, 2025: Serbia linük nung Evangelical lenirtemi Serbia nung yimsüsürtem atema sarasademjang, kechiyong iba linük nung civil war adoktsüsa lir, ta metetdaktsü.

Ochimashi anema Serbia nung tesüiba ita aika nüburtemi longkak aita aruba sülen tang tensa kanga mejungi kümdar.

Yaküm November ita nung Novi Sad Railway Station kilem chirepa nisung 15 asüba nungi nüburtemi longkak ait tenzüka liasü.

Serbia nunger aikati sorkar ochimashiba aser tamakok ajanga iba lendong ya atalok, ta tai tongloksü. Iba tatalokba nungji ajemdaker nüburtemi Serbia nung tekeraba nung election agia Aleksandar Vucic Tir menden nungi anentsütsü atema takhangba agüja longkak aiter.

Serbia nung evangelical

Khristan lenirtemia longkak aitba nung shilem agia sorkar inyaksangshi ajak teladak asütsü atema takhangba agütsür.

Belgrade, Novi Sad aser tanga yimti aika nung longkak aitertemi police den rarar aser ruling party indang office aika raksatsür. Talisa Tir, Vucic'er party Serbian Progressive Party (SNS) wako raksatsür aser office tem amaker.

Tang iba ama tensa ka nung Serbian Evangelical Alliance-i linük tesem ajaklen lumia sarasademtsü ayongzüker.

Serbian Evangelical Alliance nung Tir aser Evangelical University Students General Secretary, Samuil Petrovski-i, "Onoki nenok sarasadem nüngdaker. Yimsüsürtemi kanga shisa kaa telemtetba agitsü atema sarasademjang," ta metetdaktsü.

ANOGO ABEN TSÜNGREM DEN

Tejaokba ka - T. Ken 66:1-7

Tenüingsang ken 66 nung tejaokba kar lir item "arung" ta asüba nung sendaktepa lir. " arung aser ken tenang", "arung aser ajiang", "aser arung aser angang". Mezüing tejoakba anaji reprangdangdi.

Mezüingbuba nung tejaokbaji arung aser ken tenang. "Pa tenüng sentsüwangshi ken tenang"(t.2). Ken ken tenüng asangbaji talaktsü ka amai asenoki bilemer. Ken ken asenoki azümesen yimya nung Pa tushir. Saka ken züluri sentsüwangshia tushitsü ashir. Kechiba? " ne mapatem koda tetsübuttsü, ta Tsüngrem dang shiang. Ne ain uluba ajanga ne tsükchirtemi peisasa ne dang azüzüktsü. Alima ajaki na külemtsü, aser ne dang ken atentsü"(t.3,4). Ibai missionary tejangraba ka lir. Asenoksasa asenok Kibuba asangtsüba masü. Asenok aru aser ken aten, aser alima ajak asenok den atentsü asenok jaoker.

Tanabuba tejaokbaji arung aser Tsüngrem mapa ajiang. Tanü meimchiri Tsüngrem mapatem dangji yimya ozüing mesüra scientific ozüing ta ajar. Asenoki rasaa ashitsü meranger, saka meshiteter. Arung aser Tsüngrem mapatem ajiang-kotak nung kechi ataloker, ne temang nung kechi ataloker aser otsü nung kechi ataloker. Ibai Tsüngrem mapa lir. " Pai pei tashi agi yimsü asür" (t.7). Satani iba lima yimya (system) nung yimsü masür- Tsüngrem lir. Pai satan dang langka kar inyaktsü melar, saka ibajia Pa sentsüwangshi asoshi amshir. Tsüngremi Pa tashi agi yimsü asür, aser Pai teti yimsü asütsü.

Nai tanü pelaa linera, arung aser ken tenang. Na ne ken samar lira, arung aser Tsüngrem mapatem ajiang. Talangka meli-i na ken tena alitsü.

Na tenüingsangken samaa lir asü? Arung aser Tsüngrem mapatem ajiang; iba yagi ne ken meyipa agütsütsü. Pa mapatem agi Pa uluba aser temeim jungkai adoktsür. Na Kibuba den jaja lira Kibuba tushiang aser tangar dang Pai ne taküm nung kechi inyak aji shiang.

Novi Sad nung pastor, Rev. Dusan Beredi-i, "Longkak aitba yimya melenshiogo. Joko longkak aitba ya kaketshirtemi leniba nung masü aser tashiyim amshitep tenzükogo. Telemtetba ka agitsü atema Arogotemi sarasademtsüdar," ta metetdaktsü.

University of Belgrade nung Assistant Professor, Tatjana Samardžija-i, "Iba tensa ya maziüoktettsüsa kümdar. Joko civil war tenzüksüsa lir, anungji onoki nenok sarasadem kanga nüngdaker," ta metetdaktsü.

Taküm March ita nunga Samardžija-i nüburtem dang Tsüngrem dang tatok meshitsü aser Tsüngrem dangi meyiptsü ayongzüka liasü.

Lai sangdong ka ajanga, "Asenoki temenen mapa inyakba ajanga linüki ayatai ajurutsüsa lir. Ajisüaka nai temelung meyipra Tsüngremi na kümzüksü," ta metetdakja liasü. "Nisung aika atema ochimashi ya taküm shilem ka kümdaktsüogo. Ochimashi, kinünger tejak repranga inyakba aser sübokrem agi süngogo. Ochimashiba linük kaji Tsüngremi sendoker, ajisüaka nüburtemi temelung meyipra Tsüngremi mesendoktsü," ta lai ashi. Lai Arogotem danga, "Loktiliba nung makmakshishi aliba mapang nung ochi Arogoi dang temelenshi bener arutsütettsü. Arogo nung züngsemtemji ochimashirtem mesüra anemsü süra temelenshi bener marutsütettsü," ta ashi. "Mapang ajak nung Khristantemi ochi atema nokdaktsüla. Kechi tia ajurudir ajuruaka Khristantemi ochi atema nokdaktsüla. Ainkartemia yamaji inyaka aruogo," ta lai metetdaktsü.

AO OSHI ANGAZÜKDAK:**TANÜ ANGAZÜKTSÜBA OJANG****Tesüpet**

(adv) ki junga meyanglutet, teyanglupet (ill- constructed)

* Ki tesüpet nung alitsüba ji jangratemtsüka masü.

Tesüsü

(adj) tokuro, magütsünüba jakla (stingy)

* Tesüsü nisung den aikati meliteter.



Tir Yimym

OLONG PAITEP # 7251

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

1. Nisung jenti

- (5)

4. Tsük rudenba

- (5)

6. Temzüng tesashi

- (5)

8. S _ _ _ i

- (3)

9. Nisung telemsa

- (3)

10. Anogoshi

- (4)

12. Ajanga aor

- (4)

13. Tsük rizüngdak

- (3)

14. Tebang nungi adokba

- (3)

16. Süngdong tatembangtiba

- (5)

17. Meputep

- (5)

LANGTSÜNGLEN

1. Tenük telong

- (9)

2. Committee dang ajar

- (5)

3. Yagi ki okdoker

- (7)

5. Yim lenmang

- (5)

7. Temoatsü keter meyipa aruba

- (9)

11. Kanga junga menemba

- (7)

12. Majinü

- (5)

13. Tzüma nung senzüba

- (5)

OLONG PAITEP # 7250 TELANGZÜBA**TIPIEN :**

2. Bangsemo, 6. Tiptem, 8. Jen,

9. Taliila, 11. Aren, 12. Tzübo,

14. Alia, 16. Angati, 17. Odi,

18. Azü, 19. Sünglang.

LANGTSÜNGLEN :

1. Yipten, 3. Nüja, 4. Sangro,

5. Milen, 7. Tulu, 10. Laza,

11. Aben, 12. Tiyong, 13. Ajizük,

14. Aitsü, 15. Tasa, 16. Aina.

NAI-A YA METETTER MA**Nüburtem timtibai amshiba social media platform ter:**

1 Facebook	3.07 billion (Monthly active users)	2
YouTube	2.5 billion	
3 Instagram	2 billion	
4 TikTok	1.6 billion	
5 Snapchat	850 million	
6 X (Twitter)	586 million	
7 Pinterest	537 million	
8 LinkedIn	350 million	
9 Threads	275 million*	
10 Reddit	185-226 million**	

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirymim@gmail.com nung yokang mesüra Tir Yimym bureau tem nung agüjang.

Tepela Tasoba Anogo



1. Tenüng :
2. Tasoba anogo :
3. Küm : 4. Class :
5. School :
6. Talidak :
7. Salem osang :

Assam CM, Kiren Rijiju nati Syeda Hameed aitsü

Guwahati, Luroi/August 25 (Agencies): Union Minister Kiren Rijiju aser Assam Chief Minister Himanta Biswa Sarma nati Hombarnü Syeda Saiyidain Hameed aitsüogo. Hameed ya Manmohan Singh sorkar kübok Planning Commission züngsem ka liasü aser lai India nung aliba Bangladesh nungertem pusemba atema tenati la aitsüogo.

Hameed, shibai tanga activists tem den Assam sendanga liasü, lai Bangladesh nunger ya-a meimchi lir aser alima ya ajak lishia kanga tulu ta shia parnok India nung alitsü atema tenokdangba magütsütsüla, ta ashi.

Iba dak sendakba nung Rijiju-i, "humanity tenüng nung nüburttem anisar. Iba ya asen ali aser maitsü indang lir. Kechiba Bangladesh aser Pakistan nung nütsüng agi ajema aliba Buddhists, Christians, Hindus, aser Sikhs nungertem reshikangshir? Syeda Hameed ya Sonia Gandhi aser Rahul Gandhi na den kanga junga sendaktepa alitsü akok saka lai özüng alema aruba migrants tem pu masemtsüla," ta ashi.

Assam sorkari state nung özüng alema sorkar ali atsünger alirtem aninba mapang Hameed-i iba olen ya lemsatepogo. Prashant Bhushan aser Harsh Mander nunger amala activist temi meiner lai Muslim nungertem Bangladesh nunger ama kümja Assam sorkari parnok anema jenjang agiba asoshi lai sorkar aija liasü.

Maneni lai, "parnok Bangladesh nunger asünunga kechi tai ali? Bangladesh nungera meimchir lir. Alima ya tulu; Bangladesh nungera idaki litettsü. Parnoki nisung kar pei temeden agitsü nungi nokdang asü," ta ashi.

Terenlok maparen balala dak sendakba nung Prashant Bhushan-i, Assam Chief Minister Himanta Biswa Sarma aitsü aser ashiba agi, pai özüng alema inyaksangshir, Bhushan-



Syeda Saiyidain Hameed

i ashiba agi, sorkari lisopurtem Bangladesh-i yoker aser parnok ki özüng alema raksatsür.

Bhushan-isa, iba inyakyim ya Assam sorkari rakzükrakdemba ka lir, ta ashiba den sorkari iba inyakyim ya nüburttem nem memetdaksütsü atema merangdar, ta shisem.

Chief Minister Sarma-i, parnok sorkar inyakyim pusema jembi aser ashiba agi, Congress lenirtem aser ken o nung sendaka aliba shisakartemi state tamendakdak anokshitsütsü akok.

Maneni Adani Group densema private corporation tem nem tribal tem indang alutem agütsüba atema Assam sorkar aija arudar. Bhushan-i iba inyakyim ya-a aitsüogo. Paia, item inyakyimtem bushisüngdangtsü atema nokdangba aitsüogo.

Syeda Saiyidain Hameed shiba Harsh Mander, Wajahat Habibullah, Fayaz Shaheen, Prashant Bhushan, aser Jawahar Sircar nunger densema opposition lenir aser policy yanglurtem delegation nung shilem ka liasü, lai Bangladesh nungertem India nung alitsü temeden pusema jembi ba ajanga mepetmesü adokdaksüogo. BJP-isa, özüng alema linüki arua alirtem pusema jembirtem nem tetushi agütsüba atema Coingress aitsüogo.

Iba telok yagi Goalpara aser iba temeket sendanga liasü, kong Assam sorkari tawa Bangladesh nunger dak rangloker eviction drive tem ayongzüka agiogo.

Hameed-i iba olen lemsatepba ya Assam Chief Minister Himanta Biswa Sarma-i aitsüogo. Sarma-i X nung, "Jamaat-e-Hind-i yashi ni agintsü akhangba sülen Delhi nung amendaker aliba team-Harsh Mander, Wajahat Habibullah, Fayaz Shaheen, Prashant Bhushan, aser Jawahar Sircar- tang Assam nung mongzüka lir. Parnok nükjidongji özüng kübok ali atsüner alirtem aninba inyakyim ya 'humanitarian crisis' ka kümdaksütsü asoshi lir. Iba sentong ya onoki özüng alema ali atsüngertem anema raraba tashi meiti kümdaksütsü atema lir. Onok kümküma aser masetshi-i nokdanga lir aser özü ali aser maitsü wazüka ayutsü atema shingia onok menokdangtetsü," ta zülutsü.

Paia, "Syeda Hameed ama nisung shirnok Gandhi'er kibong den kanga junga sendaktepa lir, parnoki özüng alema arurtem pusemer kechiyong parnoki Assam ya Pakistan nung shilem ka kümdaksütsü atema Jinnah nükjidong aliba ataloktsütsü meranger. Tanü Assamese nunger maitsü ya sama taoer dang lir aser aji la amala nisungtemi teyari agütsüba ajanga lir.

Ken o kanga junga jangja yudi, Bangladesh nunger ya Assam-i marudaksüner. Iba ya parnok ali masü. Shirnokisa parnok atema aria bilemtsür parnoki parnok kima item nüburttem ya lidakjang. Assam ya özüng alema arurtem meyong maliasü aser kodanga masütsü," ta ashi.

GSU aser NESO nati special task force tentettsü akhang

Shillong, Luroi/August 25 (Agencies): Garo Students' Union (GSU), den North East Students' Organisation (NESO)-i Meghalaya sorkar dang, Garo Hills-i bendangertem senoka aitba nokdangtsü atema takaratiba nung Special Task Force (STF) aser check gate tem amenoktsü takhangba agütsüogo.

Lokti tentet anaprongla nungi züngsemtemi Honibarnü South West Garo Hills kübok arrtsü nung aliba tesemtem aika semdang aser parnok tebilemtsü lemsateptsü atema Deputy Commissioner Hema Nayak den ajurutepa liasü. Tesem balala semdangba mapang parnoki Bangladesh aser Assam nungi asütsü ta temulung melemi bilemertemi Sixth Schedule kübok teküzmükba nung tokja aliba tesemtem özüng alema atsünger

aliba nguteta liasü.

GSU tir Tensak G. Momin-i ashiba agi, senden amenba mapang Deputy Commissioner-i tensa majungba agizükogo. Lai parnok dang ketdangsurtemi tesem balala meita ao tenzüko, saka mapa kanga junga benoka inyaksü atema data tali nüngdaker ta ashi.

Lokti tentettemisa tang benoka aliba inyakyim aitsüogo aser ashiba agi, highway aser lenmangtem nung dang bushisüngdang balala benoka inyakba yagi tebilemtsü ajungabo mebentetter. "Local tem aikati özüng alema arua alirtem kümzüka ayur, kechiyong parnok sendaktepa lir. Nokma karibo bendangertem nem kuli kakat agüja parnok state nung mapang talang ka alir kümtsür," ta parnoki ashi.

Centre sorkari state ajak

dang özüng alema arurtem azüoktsü atema special task forces tentettsü tetuyuba agütsüba indang jembi ba mapang Tensak-i, iba jenjang agitsü atema Meghalaya sorkari kecha jenjang agi magi ta ashishia liasü. "Iba ken o nung state-i kecha jenjang magir ama bilemer. Khasi Hills nung Khasi Students' Union (KSU)-i inyakba ama GSU-ia meita aoba sentong benoka inyakdar. Onoki maneni inyaksü aser nüngdak dang süra longkak aitba sentongtem dena ayongzüka ketdangsurtem nongshitsü," ta pai ashi.

NESO otongdaria, "state-i STF ya yakta nungi tenteter asütsü asü. Centre tetuyuba sülen anidaka onoki sorkar dang takaratiba nung jenjang agitsü, özüng alema arurtem jangjatsü aser parnok meyipa yoktsü ayongzüker," ta ashi.

Vietnam nung yipru tesashi arur, nisung 500,000 dak tema ainshitsü tuyu

Hanoi, Luroi/August 25 (Agencies): Typhoon Kajiki tonga arutsü lia Vietnam linük nung nisung 586,000 dak tema pei ki yutsür ainshitsü totuyuba agütsüogo.

Iba yipru nungya mopung ya ghonda ka nung kilometer 166 (103mph) tashi sashia aoner aser Hombar nikongdang alinük tonga marudang ano tesashiba akumtsü imlar, ta tzüngsang-mopung takzür temi ashi.

Thanh Hoa, Quang Tri, Hue aser Da Nang ama central province tem nungi nüburtem dang pei ki yutsür ainshitsü totuyuba agüja lir. Tayimtsü tem thiogo aser rong tem dang tzükum nung alitsü shia lir.

Yipru ya China nung aliba Hainan alema longa aor, aser China indang weather agency ajanga tzünglu 320mm (12.6in)

arutsü takzüa lir.

Hombarnü Vietnam sorkari ashiba agi, tzükumlen nungi nisung 30,000 shi anizüker ogo. Nisung million ka dak tema anizüker aotsü, ta ketdangsür temi Deobarnü shia liasü.

"Iba yipru ya kanga kerar aser lendong tulu keta lir," ta sorkari Deobar aonung sangdong ka nung ashi aser Kajiki nung tzünglu tesashi, tzümetsüng aser alinen alitsü ta ashi.

Nüburtem tesem balala nungi anizüker aoba nung yaritsü aser timtem nung alirtem bushia kumzüksü asoshi sepai 16,500 aser paramilitary personnel 107,000 renema lir, ta sorkari sangdong nung ashi.

Thanh Hoa aser Quang Binh provinces nung airport ana shibangogo, ta Civil

Aviation Authority of Vietnam ajanga shi. Vietnam Airlines aser Vietjet Air ajanga iba tesem nungi aruba aser aoba tayimtsü aika Deobarnü aser Hombarnü asoshi athi.

Tzükum len aliba province tem nung Hombarnü nungi tenzüka rongtem tzyüim leni aoba nokdangogo aser tzyüim nung alirtem meyipa arutsü shiogo.

Vietnam nung yipru tesashi kanga arur aser ibaji ajanga tzümetsüng aser alinen tesashi bener arutsür. 2025 küm tenzüker mezüng ita tenet tsüngta alimar lendong balala nung nisung 100 dak tema takum samaogo, ta Ministry of Agriculture ajanga ashir.

Taoba küm Typhoon Yagi ajanga nisung 300 shi tepset aser sen \$3.3bn jenjang ki o jen raksatsü.

Israel-i Gaza nung mozüki amak, osangbener 4 tepset

Deir al-Balah, Luroi/August 25 (Agencies): Hombarnü Israel-i Gaza south len mozüki ka amakba nung The Associated Press atema freelancer inyaker ka densema osangbener pezü tepset, ta health ketdangsür temi ashi.

Arishi küm 33 tain visual journalist Mariam Dagga ya Gaza nung rara tenzüka sülen AP aser danga news outlets atema freelancer inyaka liasü. Dagga den ano osangbener kar asüba osang angazüka aoksar aser jashir ta AP sangdong ka ajanga ashi.

Nasser Hospital nung amakdang ajak agi nisung 19 tepset, ta Health Ministry indang records department tekolak Zaher al-Waheidi-i ashi.

Dagga ya arishi küm 12 tain jabaso ka lir, shiba rara tetenzüklen Gaza nungi anizüker ao, aser la timba Nasser nung liasü aser lai tesüsa osang züluba ya mozüki nung doctor temi yasa-tzüra aliba tanurtem kumzüksü merangba nung timtem ajuruba

indang liasü.

Nasser amakdang tepseter rongung ozü osangbener Mohammed Salam dena lir, ta Al Jazeera-ia jangjatsüogo. Reuters-ia par contractor cameraman Hussam al-Masri tepset aser contractor photographer Hatem Khaled yiru ta ashi.

Israel ato kilonser indang office aser Israel mitkar temi iba tesem amakba indang telangzüba kecha magütsü.

Media nung inyaker asoshi Israel-Hamas rara ya tamajungtiba lir, aser Gaza nung ita 22 raraba nung osangbener 192 tepsetogo, ta Committee to Protect Journalists ajanga ashir. Russia-i Ukraine nung raraba nung osangbener 18 tepseta lir, ta CPJ ajanga ashi.

Khen-khen tanüker yoka Gaza tesem kar sema anir jajaba dak alaka Israel-i international media nem iba rara indang osang abentsü memelar. Yangji atalokba alima dang sayutsü asoshi news

organizations temi timba Gaza nung Palestine nunger osangbener aser yangji alirtem dak metaloka alir. Israel-i aiben item tesendaktep aser Palestine nunger osangbener temi bendanga-radanga osang abener ta aitsür saka dangarbo maitdaksür.

Gaza nung osangbener mapa inyaker aika yangji aliba nüburtem ama pei aser pei kibong asoshi chiyongtsü angutsü timtemer.

Hombarnü Gaza nung aliba Health Ministry ajanga ashiba agi, asürtem ya mozüki indang floor pezü buba nung anaben amakdang tepset - khen missile ka khaloktsü aser mapang tatsüka lir rescue crews tem arudang ano kha khaloktsü.

"Iba ama tesempatsü mapa tamajung inyakba ya Israeli occupation, American administration aser United Kingdom, Germany aser France ama kin ajunga samatsütsü asoshi mapa tamajung inyakba nung shilem agiba linüktem mapa lir."

Bangladesh lenir Yunus-i Rohingya nunger asoshi ochi obendang akhanger

Cox's Bazar, Luroi/August 25 (Agencies): Bangladesh indang Chief Adviser Muhammad Yunus-i Rohingya refugees 1.5 million par linük nung jenoka aliba nem joko teyari tali magütsütettsü, ta tekumdangtsü ashi aser linük balala dang reshikangshia amshiba kin tila ya pei tasoli Myanmar bushia pei sasa mulunga aotsü asoshi sentong yanglutsü ayongzük.

Kin tila Muslim nunger timba sür Myanmar nung Rakhine state nungi okshia mindoker küm ti ajungba temaitsü Cox's Bazar nung anogo ana mungdang Hombarnü Nobel peace sempet angusang-i refugees tem timtem makai pei sasa meyipa aotsü nükjidong nung sentong kara lemsatepa liasü.

"Parnok par tasoli aser par kidangi aotsü temeden agütsütsüla. Parnok tajungtiba nung kumzüka aser ajungshia masü pei sasa meyipa aotsü asoshi ajaki lenmang yanglutsüla. Iba mapa inyaksü mapangji tangya lir," ta Yunus-i ashi aser senotsü teyari agütsürtem dang maneni tenla agütsütsü ayongzük.

Pai Myanmar nung tekeraba nung azüdokshi anentsü, kin balala tsüngta mangatettep adoka aliba ajemtsü asoshi jembishinü akatsü sapang agütsütsü, ASEAN aser region nung tashi aliba linüktem tashi taitba nung shilem agitsü ayongzüka liasü.

Yunus-i alima ajunga nung aliba sorkar tem dang Myanmar nung "ethnic cleansing" anema akang-akanga nokdaksü aser iba linük indang mitkar yimli den tesendaktep reprangshitsü ayongzüka liasü.

Pai International Court of Justice (ICJ) aser International Criminal Court (ICC) nunga ochishia mapa shidak inyakba nung asendenshitsü ayongzük aser kin ka okshia samatsütsü merangba tatem kati arutsü aser Rohingya nunger timtem majurui meyipa aotsü asoshi

ochi obendang tongtipang lir ta ashi.

Mitkar temi pua merenshiba aser reshikangshia amshiba mechi Rohingya nunger 800,000 jungnüa 2017 küm August ita Bangladesh nung arua jenok, koba kin ajunga samatsütsü merangba lir ta United Nations-i ashir.

Iba sülen ano nisung miyirijang aika jena arua lir. "Iba tebilemstü ajanga asen rongsenketzüng, ali rongsen, libajen, loktiliba aser yimsüsüba tsütsü timtem tulu agütsür. Yariteper aser Bangladesh nüburtemi temulung ajak agi bendanga agüja yaritepba asoshi pelar," ta Yunus-i ashi.

September 30 nü New York nung UN mungdang alitsü lia Cox's Bazar mungdang ya agir, saka Rohingya nungertem timtem majurui pei tasoli bushia aotsü nükla kangabo majiteter.

Rakhine nung rara tamajungba kuma aser US Tir Donald Trump-i humanitarian aid soitba sülen linük balalai teyari agütsüba agimaka 2024 küm tetenzüklen nungi tang tashinung nisung tasen 150,000 dak tema Bangladesh nung arua lir.

2024 budget tesadang ka jungnüa US-i agütsüba nung metaloka aliba World Food Programme-ia tan ita ang central Rakhine nung aliba kibongtem shilem 57 tashi chiyongtsü peria mangur ta shia lir.

Camps tem telung nung chiyongtsü agi anüngba ya anogoshi ajurur. Refugee tem monthly ration card nung metaloka alir, koba sen \$12 shi lir.

2022 nung UN indang tematiba court, ICJ dangi The Gambia ajanga Myanmar anema ken o ka benok, koba Rohingya nunger kin samatsütsü merangba indang bushisüngdang.

ICC prosecutor ajanga 2024 nung Myanmar mitkar yimsüsür Senior General Min Aung Hlaing anema international arrest warrant agütsütsü mepishia liasü.

GOVERNMENT OF NAGALAND

DIRECTORATE OF HEALTH & FAMILY WELFARE

NAGALAND:: KOHIMA.

No.DHFW-5/D.Pharm/Part-II/2014/

Dated, Kohima th August 2025

ADVERTISEMENT

As per Government Approval Vide Order No.MED-5/AE/10/2005/168/Dated, Kohima the 22nd August'2025. Applications are invited from the local candidates to undergo **Diploma in Pharmacy** course for the academic session 2025 at **Assam Medical College, Dibrugarh. The last date for submission of application form 28th August 2025.** Short listing criteria and other details are as follows:

1. 5 (Five) Nos. of Seats available.

2. Applicant should have cleared HSSLC (10+2) in Science Stream with minimum 45% in case of SC/ST candidates (English as one of the subjects and Physics, Chemistry & Mathematics (PCM), Physics, Chemistry& Biology (PCB) or any other qualifications approved by the Pharmacy Council of India.

3. All relevant documents : HSLC & HSSLC Admit card, Mark sheet, Certificates, SC/ST Certificates, Indigenous Certificate, one recent Passport size photo, should be enclosed along with the application with complete address and contact no.

4. The maximum age limit is 25 years as on 1st August 2025.

5. Application Form can be downloaded from the Department website: **nagahealth.nagaland.gov.in**

6. Last date of submission of Application forms will be on **28th August 2025.** Duly filled in application in hard copy along with requisite supporting documents should be submitted in Room No.210 (Training Section) along with Rs.200/- as processing fee.

7. Selection will be done based on Academic Merit Marks.

SD/- DR. MERENINLA SENLEM

Principal Director

Directorate of Health & Family Welfare,

Nagaland: Kohima.

Office of the

Mangmetong 'A' Khel Senso Mungdang

P.O. Mokokchung -798601, Nagaland

SANGDONGER

Mr Temjennungsang Kichu (Chungtia) pai Mangmetong 'A' Khel senso Raising Fund sen apua aliba magütsütsü ta ashiba dak ajemdaker tanü 22.8.2025 anogo Mangmetong 'A' Khel senso lenla senden mena telemtetba yamai sangdonger.

1. Mr Temjennungsang Kichu aser par kibong Mangmetong 'A' Khel lushi nung tetsüng ajemoktsü memelar.

2. Mangmetong 'A' Khel senso shinga par kidangi maotsü.

Iba telemtetba nung shibai aibelendir pa/la sobaliba tapet agi merenshitsü.

Sd/-

Imtiakum Tzüdir

President

Mangmetong ‘A’ Khel Senso Mungdang



B. Watitemjen

General Secretary

CAFA Cup atema India Squad sangdongogo



Luroi/August 25, 2025

(Agencies): Khalid Jamil-i CAFA Nations Cup atema asayar 23 agi kumtetba India team sangdongogo. Team nung goalkeeper Gurpreet Singh Sandhu-a zungoksema lir.

India tebur football team Central Asian Football Association (CAFA) Nations Cup 2025 nung asayatsü, koba August 29 nungi tenzüksü. Logistic ken o aser asayar peria maliba ajanga Malaysia-i iba asayamung nung shilem magitsü telemtetba agiba sülen India asayatsü lir.

Asayamung nung India team Group B nung asayatsü. Parnok Dushanbe nung Tajikistan den August 29, Iran den September 1 aser Afghanistan den September 4 nü asayatsü.

India head coach tasenba Jamil atema iba asayamung ya AFC Asian Cup qualifiers masaya tsungda team

asadangtsü asoshi maongka tajung ka asütsü.

"Asayar ajak atema kü kishi teti lapoka lir. Team tajung den asayaba mapang asayartem tendangtsü asoshi CAFA Nations Cup ya maongka tajung asütsü. Asayar kar tang team nung malitsü akok, kechiyong ni junga metendangi aliba asayartem kar tendangner, saka Asian Cup qualifiers atema team tajungtiba yoktsü," ta Jamil-i ashi.

Telok anaprongla nung temaba jenjang nung tembangba team ana play-off stage-i aitsü aser asaya ana ya September 8 nü asayatsü. Group runners-up tsungda tasembuba jenjang atema asaya Dushanbe nung asayatsü aser final ya Tashkent nung asayatsü.

CAFA nung Afghanistan, Islamic Republic of Iran, Kyrgyz Republic, Tajikistan, Turkmenistan, aser Uzbekistan

densema lir. Oman aser India na ya iba asayamung atema jaokba team ana lir. 2023 kum final nung Uzbekistan goal 1-0 agi akokba sülen Iran defending champions lir.

The CAFA Nations Cup atema India Squad:

Goalkeepers: Gurpreet Singh Sandhu, Amrinder Singh, Hrithik Tiwari

Defenders: Rahul Bheke, Naorem Roshan Singh, Anwar Ali, Sandesh Jhingan, Chinglensana Singh, Hmingthanmawia Ralte, Muhammed Uvais

Midfielders: Nikhil Prabhu, Suresh Singh Wangjam, Danish Farooq Bhat, Jeakson Singh, Boris Singh, Ashique Kuruniyan, Udanta Singh, Naorem Mahesh Singh

Forwards: Irfan Yadwad, Manvir Singh (Jr.), Jithin MS, Lallianzuala Chhangte, Vikram Partap Singh

Head coach: Khalid Jamil.

US Open: 2021 Champion Medvedev 1buba round nung tsükogo



Luroi/August 25, 2025

(Agencies): Hombarnü US Open tebur kija asaya mezüngbuba round nung France nunger asayar Benjamin Bonzi-i Russia nunger 13 seed asayar Daniil Medvedev tsükdaksüogo.

Bonzi-i iba asaya ya ghonda asem ser minute 45 asayaba sülen 6-3, 7-5, 6-7 (5/7), 0-6, 6-4 agi koka liasü.

Tasembuba set nung 5-4 ta Bonzi tejakdang sür pai serve asüba mapang pai mezüngbuba serve nung fault ka mena saka noksa tangoker ka aibelena court telungi aiba ajanga asaya meinprong aser iba sülen chair

umpire Greg Allensworth-i Bonzi nem ano first serve ka agütsüba atema Medvedev kanga mepelai liasü aser umpire ya kidangi aotsü ariteper ta shia pa aija liasü.

Tebur kija asaya nungsa arishi kum 38 tain Serbia nunger asayar Novak Djokovic-i mezüngbuba round nung US nunger asayar Learner Tien 6-1, 7-6 (7/3), 6-2 agi kokogo. Ajisüaka Djokovic-i pa temang agi Grand Slam kija asaya 25buba akoktsü atema memelatsü akok ta bilemer.

Asaya nung tanabuba aser tasembuba set tsungda Djokovic blister adokba anepalutsü atema medical timeout talangka agia liasü. Iba sülen pai, pa tanabuba set nung ajungbena stamina maka akümba indang lemsatapa liasü.

"Ni kanga junga asaya tenzük saka tanabuba set nung game talang kar asayaba sülen ni mimlai lia temang mejungi aküm. Küna talangla asaya aser ni asayaba yimya mejungi küma

aibelen aika mena. Tanabuba set nung atalokba ama mataloktsü imlar," ta pai ashi.

"Ni yiruyipong kecha mali, ajisüaka ni rally talangla asayaba mapang tim atemer aser points tsungda kara kara recover masür," ta pai shisem.

Kasa asayamung tetsür kija asaya nung world number one asayar Aryna Sabalenka-i Deobarnü 7-5, 6-1 agi Switzerland tsür Rebeka Masarova koka la indang title defend asü tenzükogo. Sabalenka ya Serena Williams sülen US Open kum ana atonga abenba mezüngbuba asayar akümtsü meranga asayadar

Tetsür kija asaya tanga ka nung Philippines tsür Alexandra Eala-i 6-3, 2-6, 7-6 (13/11) agi Denmark tsür Clara Tauson kokogo.

Ano Southeast Asian nungi asayar Indonesia tsür Janice Tjen-ia Russia tsür Veronika Kudermetova 6-4, 4-6, 6-4 agi koka tanabuba round tongtetogo.

Saka yiruba ajanga hopta pezü masayatettsü

Luroi/August 25, 2025

(Agencies): Bukayo Saka, Deobarnü Arsenal pur Liverpool den asaya aser England team Andorra aser Serbia na den taruba ita World Cup qualifier asayatsü aliba nung masayatettsü.

Arishi kum 23 tain asayar ya Honibarnü kidang Leeds United akokba asaya nung hamstring yirur tuguatok aser pa hopta pezübo masayatettsü akok.

Kasa mapang nung Leeds den asayaba mapang tapu yiruba sülen Arsenal captain Martin Odegaard-a Anfield nung asayatsü aliba asaya nung asayatettsü masayatettsü mejangja.

Leeds pur goal 5-0 agi akokba asaya nung Odegaard ya asaya mezüngbuba shilem nung melen aser pa kanga mejungi yirur alitsü ama

reprangtetogo. Taoba mapang Real Madrid nungi asayar ya tapu sü ali aleper Emirates Stadium toktsür oa liasü.

Norway nunger asayar ya tang tashi Premier League champions den asayatsü aliba asaya nungi mezüngtoki lir aser pa taneptsü angutsü imla atadar, saka Saka bo mapang talang ka masayatettsü.

Saka ya taoba season-a hamstring yiruba ajanga ita asem tashi masayateti liasü.

Ajisüaka Viktor Gyokeres, Noni Madueke aser Eberechi Eze nunger alizükba sülen Arsenal team nung forward asayatsüpur asayar tajung aika lir.

Maneni Gunners manager Mikel Arteta ket nung Saka aser Odegaard na melentsü asoshi Martinelli, Leandro Trossard, Ethan Nwaneri aser Max Dowman nungera lir.

World Archery Youth C'ships: Chikitha-i otsü tasen yanglu



Luroi/August 25, 2025

(Agencies): India tsür archer Chikitha Taniparthi-i, Winnipeg, Canada nung 2025 World Archery Youth Championships nung Under-21 women's compound asaya koka otsü tasen ka yangluogo.

Youth World Championships nung iba category nung India nunger rongnungi Chikitha-i tang mezüngbuba gold medal ka nguogo. Knockout asaya tepeyong nung arishi kum 20 tain asayar yagi kanga junga asaya liasü.

Semifinal nung lai Spain tsür Paula Diaz Morillas 142-133 agi koka liasü. Final nung la Republic of Korea tsür Park Yerin den kanga toktepba asayaba sülen 142-136 agi asaya koka gold medal nguogo.

Quarter-finals nung Chikitha aser külem India tsür Parneet Kaur na kanga toktepba asayaba sülen Chikitha-i 146-143 agi asaya koka liasü.

U18 compound event tem nunga India nunger archer temi kanga junga asayaogo. Tetsür semifinal asaya ya India tsür ana asaya aser Prithika Pradeep-i

130-128, ta tera agi dang Surya Hamsini Madala akok, saka lai final nung America tsür O'Donohue Savannah 143-140 agi mekoki silver medal angu. Tebur U18 tetoktepba nung Yogesh Joshi-i semifinal nung 136-132 agi New Zealand nunger asayar Hector McNeilly makok.

Bronze medal atema asayaba mapang Joshi-i kanga meranga asaya saka Chinese Taipei nunger asayar Yen Tzu Hsiang-i pa 143-139 agi koka medal ka danga mongutet. U18 mixed compound team event final nung Prithika aser Mohit Dagar nati 150-149 ta tera agi dang America nunger tarep O'Donohue Savannah aser Caleb Quiocho na makok.

Iba asayamung nung India team-i gold asem, silver ana aser bronze medal ka ngua parnok tasembuba jenjang nung lir. US team-i gold pezü, silver ka aser bronze medal pongu ngua parnok temaba jenjang nung lir aser South Korea-i gold asem, silver pezü aser bronze medal ka ngua parnok tanabuba jenjang nung lir.

BILEMDANGANG

"Kechi yimya agi na atsüdaker aji raktokang."